

## Dithero tsa Tirelano mo Kutlwanong

10/2015 Thero ka Sontaga wa 02 morago ga moletlo wa Epifaniya, e le ka 18. 01. 2015

### Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno le kwadilwe mo go Joh. 1:17, le re: **"Kana molao o neilwe ka Moše, mme bopelotlhomogi le boammamaaruri di tsile ka Jesu Keresete."**

1. Sefela sa 236 - 221/229

**2. Thapelo:** Modimo, Rara wa legodimo, re go leboga ka ntlha bopelotlhomogi jwa gago, gonne le rona ba re neng re le ba baditšhaba re bileditswe mo pusong ya gago ka Morwao Jesu Keresete gore re tswe mo lefifing, le mo moriting wa loso. Lesedi la gago le re sedifatse, re bone letsatsi le e leng Jesu Mopholosi wa rona. O re thuse kajeno gore re utlwe Lefoko la gago ka pelo yotlhe, re tsamaye mo leseding le le tswang mo go Jesu, Morena wa rona. Amen.

3. Lefoko la Testamente e kgologolo le kwadilwe mo go Esekesodu 33:17-23;

Epistolo ka fa thulaganyong ya 2 e kwadilwe mo go Baroma 12:4-16;

Efangele ka fa thulaganyong ya 5 e kwadilwe mo go Mareko 2:18-22.

4. A go ipolelwe tumelo ya bokeresete!

5. Sefela sa 229 - 215/223

6. Thapelo ya mmadi wa thero.

**7. Efangele** ka fa thulaganyong ya 1 e kwadilwe mo go Johane 2:1-11, e re: "Ka letsatsi la boraro go ne go le lenyalo kwa Kana wa Galelea, mma Jesu a le teng. Jesu le ene a lalelediwa lenyalo le barutwa ba gagwe. Jaanong ya re weine e tlhela, mma Jesu a mo raya a re: 'Ga ba na weine.' Jesu a mo raya a re: 'Mosadi, ke tlhakanetseng nao? Nako ya me ga e ise e tle.' Mmaagwe a raya badiredi a re: 'Se a ka se lo rayang, lo se dire.' Jaanong ga bo go le ditsaga tsa majwe di le thataro, tse di beilweng ka fa mokgweng wa Bajuta wa go tlhapa, nngwe le nngwe e ka tshola dikgamelo di le tlhano gongwe di supa. Jesu a ba raya a re: 'Tlatsang ditsaga tseo metsi!' Ba di tshela, tsa ba tsa tlala. Jaanong a ba raya a re: 'Gayang jaanong, lo

ise kwa go morulaganyi wa modiro.' Ba a isa. Ya re morulaganyi wa modiro a utlwa metsi a a fetogileng weine, a sa itse kwa e tswang teng, go itse badiredi fela ba ba gileng metsi, a bitsa monyadi, a mo raya a re: 'Motho mongwe le mongwe o a tle a ntshe weine e e monate pele, mme fa ba sena go kgora, go ntshiwe e e seng monate. Wena o bolokile weine e e monate go fitlha jaanong.' Sesupo seo sa ntlha Jesu o se dirile kwa Kana wa Galelea, a bonatsa kgalalelo ya gagwe, mme barutwa ba gagwe ba dumela mo go ene." Amen.

**8. Thero:** Barategi mo Moreneng wa rona Jesu Keresete, re dirile moletlo wa botsalo jwa Morena wa rona Jesu Keresete. E ne e le moletlo wa boitumelo jo bogolo jwa badumedi botlhe. Batho ba tsaletswe yo o ba tlisetsang boitshwarelo, pholoso, botshelo. Boitumelo joo jwa utlwala le mo badiseng. A tlotlo e nne ya Modimo, le kagiso mo lefatsheng, le natefo mo bathong! Jaanong re mo sebakeng sa Epifania, sa ponatshego ya kgalalelo ya Morena. A re itumeleng rona ba re tswang mo go baditšhaba, ba re tsenyeng mo tseleng ya pholoso! Le rona re na le kabelo ya botshelo ka bopelotlhomogi jwa Modimo. Kabelo e amogelwa ke badumedi fela. Kajeno re utlwa ka ga kgakgamatso ya ntlha ya ga Jesu e e dirilweng kwa Kana, e Jesu a senolang kgalalelo ya gagwe ka yona. Barutwa ba ne ba dumela mo go ene ka ntlha ya moo. Ka Efangele ya kajeno re utlwa gore Jesu o ne a lalelediwa lenyalo. **Le rona re tshwanetse go laletsa Jesu. Ee, laletsa Jesu!**

1. O tla thusiwa ke ene mo ditlalelong.

2. O lebelele nako ya gagwe fela, o se lape!

3. O itshwarelele mo tumelong ya go dumela mo go ene!

**1. Jesu o go thusa mo ditlalelong.** Barategi mo Moreneng, Efangele e re ruta ka kgakgamatso e e dirilweng ke Jesu, fa a ne a lalelediwa lenyalo mmogo le mmaagwe, le barutwa ba gagwe. Ke gore ba ne ba itsanye le beng ba lenyalo. Gape go a bonala gore beng ba lenyalo ba ratile tiro ya puso ya Modimo. Ka moo Jesu le barutwa ba gagwe ba ne ba lalediwa. Ke se segolo. Le kajeno go na le batho ba ba laletsang moruti, le moefangedi. Ke bone ba ba itseng gore ba tlhoka Lefoko la Morena mo medirong ya bone. Ba a itse gore modumedi o tshela ka go thusiwa ke Jesu. Mo boitumelong jwa bone ba ne ba tlhagelwa ke tlalelo. Fa mmaagwe a ne a bolelela Jesu gore ga ba na weine, Jesu o ne a mo raya a re: "Mosadi, ke tlhakanetseng nao? Nako ya me ga e ise e tle." Ga a ka a bua jalo ka go tlotlolola mmaagwe, mme a mo gopotsa ka boModimo jwa gagwe, o na le go tshegetsa thato ya ga Rraagwe, ga a na go kgaramelediwa ke mmaagwe, le e seng ke ope o sele, le e seng go

faposiwa mo tseleng ya boikokobetso jwa gagwe jwa go utlwa Rraagwe. A re gopoleng mafoko a mangwe a ga Jesu! Ke a: A lo ne lo sa itse gore ke tshwanetse go nna mo go tse e leng tsa ga Rre? Le fa go ntse jalo, o ne a utlwa bagolo ba gagwe. Mme o ne a tshegetsatsa thato ya ga Rraagwe yo o mo legodimong.

Wena o laletsa mang gore a tle mo maitumelong, mo medirong ya gago? A o laleditse Jesu ka metlha. A ga o itse gore ke ene molalediwa yo o batlegang bogolo? O batlega ka metlha mo go rona gore a nne teng. Fa re le mo ditlalelong, re tlwaetse go mmita, mme go ntse jang mo maitumelong a rona? Kana le mo maitumelong a rona re ka tlhagelwa ke tlalelo. Modumedi, laletsa Jesu! O mo laletse gore Efangele e rerwe fa pele ga batho ba ba tlang mo modirong, puso ya gagwe e agege mo go baditšhaba. Rapelela diphuthago, le dikopano tsa kereke ya rona, le badiredi ba Lefoko, tiro ya go rerela batho Efangele e tswelele. Mo ditlalelong, mmegele ditlalelo tsa gago, phakela, maitsibowa. Ke ene yo o tla go thusang. Kopa fela! Re se atlhole, jaaka re tlwaetse go atlhola tsa rona, re lebe thato ya Morena. Yo o ikokobeletseng thato ya ga Jesu, a lebelela Lefoko la gagwe, a mo ikanya, o tla amogela tse a di kopang ka fa thatong ya ga Jesu.

**2. Fela o lebelele nako ya gagwe, o se lape!** "Nako ya me ga e ise e tle." Ditsala mo Moreneng, badiri ba simolola tiro ka nako e e beilweng ke morena wa tiro, ba khutla ka nako, ba tlhokomela tshupanako, gongwe go lela ga tshipi. Tshupanako ke yona e e laolang. Jesu a re: "Nako ya me ga e ise e tle." A letela, a lebelele nako e e beilweng ke Rraagwe. Mo Efangeleng ya ga Johane re utlwa gantsi ka nako e e beetsweng Jesu Morwa Modimo. Bogolo nako ya go swela batho, ya go ba bogela. Le rona re tshwanetse go letela nako e re e beetsweng ke Modimo. Le mmaagwe Jesu ga a ka a ganela le ene, fa a utlwa mafoko a gagwe, a bolelela badiredi a re: Se a ka se lo rayang, lo se dire. Ba letetse nako ya gagwe. Ke fa Jesu a ba raya a re: Tlatsang ditsaga metsi! Ba di tshela, tsa ba tsa tlala. Ba bona kgakgamatso e kgolo. Ga fetoga metsi go nna weine. Barutwa ba dumela mo go ene. Go ntse jalo, phuthago. Mongwe le mongwe a a bolelele Jesu ditlalelo tsa gagwe. O tla thusa. Fela letela nako ya gagwe. O nnele mo tsholofelong, o se lape. Badiredi bale ba ne ba letela Jesu.

Go mo lebelela go a thusa. Kana ke ene Mong-wa-thata-yotlhe. O bua Lefoko fela, ga direga. Ka Lefoko la gagwe ga fetoga metsi go nna weine. Go sa ntse go na le dikgakgamatso tse dingwe tse Jesu a di dirileng, di dintsi, mo malwetseng, mo go ba ba tlaletsweng. Yona e o e dirile mo lenyalong. Morulaganyi wa dijo a leboga thata, a utlwa gore ke weine e e monate.

Mme wena a o setse o lebogile Jesu, ka o filwe dineo tse di fetang yona ya weine? O filwe Efangele, le disakaramente. Ke dineo tse di agang kereke, tse di re tlisetsang bopelotlhomogi, boitshwarelo, pholoso, botshelo. Yo o amogelang dineo tseo ka tumelo, Keresete o tla nna mo go ene, ene mo go Keresete. Modumedi, leboga ka ntlha ya moo. O mo amogele, ditiro tsa gago, le botshelo jwa gago a bo nne mo go ene. Badiredi bale ba ne ba utlwa, ba dira. Ke bone ba ba bonyeng kgakgamatso le kgalalelo ya ga Jesu. Tsala, reetsa, o letele nako ya ga Jesu, o dire tse o di bolelelwang ke ene!

**3. O itshwarelele mo tumelong ya go dumela mo go ene!** Phuthego, ke se segolo gore re itshwarelele mo tumelong. Ke se se batlegang tota gore o itshwarelele, o thatafale, o se tshikinyege, jaaka setlhare se se sa tshikinyegeng, ka se na le medi e e siameng. Le fa o ka tlhagelwa ke eng, dumela mo go Jesu, o se lape. Bontsi jo bogolo bo lapa mo tseleng, bo retologela kwa morago, bo latlhelwa ke tsela ya pholoso. Balatedi ba ga Jesu, ba ba neng ba dumela mo go ene, ba fapoga mo tseleng. Mme re utlwa se se diragetseng kwa Kana.

Barutwa ba gagwe ba ne ba dumela mo go ene. Go ne go batlega gore ba itshwarelele mo tumelong, le morago, fa batho ba le bantsi ba latlhile Jesu. Peto o ne a ipolela a re: "Morena, re tla ya go mang? Wena o na le mafoko a botshelo jo bo sa khutleng, mme re dumetse, re bile re itse gore ke wena Moitshepi wa Modimo." Ke gore le mo mathateng, le mo matshwenyegong re tshwanetse go itshwarelele mo tumelong. Tumelo ga se ya letsatsi la kolobetso, la tlhomamiso, la Sontaga fela. Mme ka malatsi otlhe a botshelo jwa gago dumela mo go Jesu, yo o bonyweng ke barutwa ba gagwe a tsogile, yo e bileng a tsosa tumelo mo go bone, a e tiisa mo go bone. A go nne jalo le mo go wena! Dumela, rra, mma, lekau, lekgarebe, ngwana! Itshwareleleng mo tumelong!

Go ntse jang mo nakong ya kajeno. Boitumelo jwa go itumelela Epifania, ponatshego ya Morena a bo sa ntse bo le teng? A re lebogeng Morena ka ntlha ya boitumelo jo bogolo jwa go tsalelwa Mopholosi yo e leng Jesu Keresete Morena, re nnele ruri mo tumelong. Kana ke ene ka nosi yo o tla dirang gore re nnele ruri mo go yona. Ke ene yo o tla wetsang tiro e o e simolotseng mo go rona.

Dipotso ke tse: A o sa ntse o atamela mo selalelong? A o tliša bana mo kolobetsong? A o ba romela mo sekolong sa tlhomamiso? A o ntsha lekgetho ka tshwanelo? Tse tsotlhe tseo di supa gore a o itshwareletse mo tumelong, a o sebopiwa se sešwa, di supa gore a tsa bogologolo di fetile mo go wena? A monate, le boitumelo, le lesego la Efangele ke tse! Le

rona re ba puso ya Modimo, gonne Lefoko la ga Keresete le re fentse gore re dumele, fa e le Keresete, Morwa Modimo, mme ka go dumela re nne le botshelo ka leina la gagwe. Phuthego, a re mo lebogeng, re boke Modimo ka ntlha ya ga Jesu Keresete. Amen.

**9. Thapelo:** Morena Jesu Keresete, Morepholosi, re a go leboga, wena yo o ratang gore batho botlhe ba pholosiwe. Re lebogela tiro e kgolo ya gago, wa tlosa lefifi, wa re tlisetsa lesedi, wa re thusa mo ditlalelong, o re itshwarela ka malatsi otlhe. O re fe thata ya Mowa o o Boitshepo wa gago gore o re gogele, le go re goga mo leseding, re go laletse go nna le rona ka metlha, re go ikanye, fa o re thusa mo ditlalelong tsotlhe, fa o re itshwarela maleo otlhe ka malatsi otlhe, re nnele ruri mo go wena. Morena Jesu, re a go leboga. Amen.

Thapelo ya Morena: Rara wa rona yo o mo legodimong ...

10. Sefela sa 209 - 193/202

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke Petrus Lubede, ka ngwaga wa 1991/2003/2009/2014.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.